

DISPUTATIO INAUGURALIS IURIDICA

DE CONIVGIBVS IN-
CANTATIS EORVMQVE
SEPARATIONE,

Von bezauberten Ehe-Leuten und derselben
Scheidung/



QVAM DEO ADIVVANTE,
RECTORE MAGNIFICENTISSIMO,

REGIA CELSITVDINE,
SERENISSIMO PRINCIPE AC DOMINO,

DN. CAROLO FRIDERICO,

HEREDE NORVAGIAE, SVPREMO DVCE SLESVICI, DVCE
HOLSATIAE, STORMARIAE ET DITHMARSIAE, COMITE
IN OLDENBVRG ET DELMENHORST, ET REL.

IN ALMA CHRISTIAN-ALBERTINA

EX DECRETO MAGNIFICI ICTORVM ORDINIS
SVB PRAESIDIO

II AMPLISSIMI ET CONSVLTISSIMI

O. ZACHARIAE HARTMANNI, D.

INSTITVT. ET IVRIS PATRII PROFESSORIS ORDINARIJ,

ET FACVLTATIS IVRIDICAE h. t. DECANI,

AD CONSEQVENDOS DOCTORIS IN VTROQVE
IVRE HONORES

DECEMBRIS ANNO MDCCXXVII. IN AVDITORIO MAIORI

CONSVETIS ANTE ET POST MERIDIEM HORIS

PVBlico ERVDITORVM EXAMINI SVBIECIT

AVCTOR

IOANNES HELVIGIVS ZIELINSKI,

ADVOCATVS HAMBVRGENSIS.

KILIAE, Litteris Io. Christoph. Reutheri, Acad. Typogr.

APRIL 21, 1932

CONSPECTVS DISSERTATIONIS.

- §. I. *Coniugiorum necessitas & utilitas.*
- §. II. *Obiter de etymologia coniugii & vocis incantare. Definitio coniugii.*
- §. III. *An detur coniugium incantatum? queritur; & affirmatur.*
- §. IV. *Obiectio: mali illius non dari posse rationem naturalem. Responsio.*
- §. V. *Quot modis contingere queant ligationes inter coniuges.*
- §. VI. *Quinam hoc loco nodatorum coniugum nomine propre veniant? Differentia inter illos, & natura, vel facto humano impotentes. De signis & notis cognoscendi ligatos seu nodatos coniuges. De ligatione & impotentia magica respectu.*
- §. VII. *Generatim de separatione coniugum incantatorum.*
- §. VIII. *Qualis impotentia requiratur, ut separatio incantatorum coniugum admitti possit. Debet illa impotentia esse plena.*
- §. IX. *Incurabilis & perpetua. An ad tollendam ligatione-*

tionem, qua laborat coniux, magicam, ad magorum auxilium confugere licet? Negatur.

§. X. An adire minimum magos licet? Non indiscriminatum.

§. XI. An impotentia ex incantatione semper perpetua sit? Incantatio & ligatio temporaria quandoque in perpetuam transit. Exemplum nobilis cuiusdam Papiensis.

§. XII. Ut ligatio coniugii magica perpetua habeatur, quantum temporis spatium requirant iura? Quomodo computandum id tempus sit?

§. XIII. Nullo declarato ac dissoluto matrimonio propter incantamentum & ligationem magicam, an id redintegrandum, si postea sanitas redierit?

§. XIV. Matrimonium propter incantationem & ligationem non soluitur, nisi ante copulam carnalem deprehensa fuerit ligatio. Gallorum cautela.

§. XV. Obiectio. Responsio.

§. XVI. Quid si incertum, accideritne impotentia ante matrimonii consummationem, an vero post illam?

§. XVII. Quid si tamen indubitatum, maleficium contigisse coniugio carnali copula iam consummato, & statim post commixtionem?

§. XVIII. De separatione coniugum ex capite odii per magiam conflatam.



DISPUTATIO INAUGURALIS IURIDICA
DE CONIUGIBVS INCAN-
TATIS EORVMQVE SE-
PARATIONE.

§. I.

Ex coniugiorum bonitate ciuium fa- *Coniugio-*
lus maxime pendet: in quo verae *rum neces-*
Politices Cultores conueniunt. Vn- *sitas & uti-*
de illud Philosophorum Princeps, *litas.*
Aristoteles: *elementum mundi & se-*
minarium generis humani, Lib. I. c. 3. Oecon. appella-
uit. Audiamus Imperatorem Iustinianum: *Matrimo-*
nium, inquit, *sic est honestum, ut humano generi vi-*
deatur immortalitatem artificiose introducere, & ex
filiorum procreatione renouata genera manent. Nov.
22. in pref. Idem sine dubio Veteres per consue-
tum

B

tum illum situm, quem in vrbe condenda adhibebant, denotare voluerunt, quem, post alios, his verbis refert Zahn. *Ichnogr. municip. c. 1. n. 12. seqq.* Qui urbem nouam condere uoluit, tauro & vacca arabat; Vbi arasset, murum faciebat; Vbi portam uolebat esse, aratrum tollebat, & portam uocabat a portando; aratrum qui tenebat, laciniam togae in humerum dextrum reiciebat, seseque cingebat, vel quia is sacris operantium erat habitus, inter quae sacra & opus condendae urbis referebatur, vel ut commodius sinuam tenere posset; denique ut multitudinem ciuium togato. i. e. pacifico habitu fouendam esse ostenderet, neque solum bellicis artibus ciuitates vigere, sed multo magis pace florere, aratrum, cuius vomer fuit aereum, in perpetuitatis symbolum, dirigebat conditor ipse; Si uero mulier ponendae Urbis auctor fuit, id muneris penes architectos relinquebatur. In fodiendo glebae interne reiciebantur, quoniam omnis fertilitas in urbem importanda. Sulcus ille, quo loca murorum designabatur, dictus fuit: sulcus primigenius. Boves duo tantum erant, taurus scilicet & vacca, quo legitimum inter marem & foeminam matrimonium denotabant, quod rempublicam tuetur & auget. Boves illi erant albi, ut

illo candore ostenderentur ciues sine labe; praeterea
 ita iuncti boues, ut vacca interior, taurus exterior esset:
 Mulieris enim est, quae intra domum sunt, curare, viri
 autem exteriora. Zahn. l. c. ibique cit. Iul. Caes. Bu-
 lling. de Rom. Imp. & Limn. de Iur. Publ.

§. II.

Haec adducere, non ut etymologiae coniugii, a quo *Obiter de*
 coniuges dicuntur, satisfaceret, sed ut necessitas illius *Etymolo-*
 magis patefceret. Iam enim siue a iungendo, siue a *gia con-*
 iugo, ut plerique volunt, coniugium potius deriuare *iugii, &*
 quis amet, nobis idem est, quippe qui praelia haec *vocis: in-*
 etymologica aliis relinquimus. *cantare.* *Definitio*
coniugii. *conf. interim Beat.*

Dn. Stein. *Dissert. de Coniugio maris & foeminae locu-*
pletis. Regiom. 1720. habit. §. 4. Pariter, quid *incan-*
tare & incantatum significet, neminem facile prae-
 teribit, ut adeo eius vocabuli euolutioni multum
 immorari vix operae pretium ducamus. Id notaf-
 se magis fortasse expedit, *nuptias, matrimonium &*
coniugium, ex communi vsu loquendi, nobis syno-
 nyma existere, nec inter illa differentiam, nisi no-
 minalem, cum Doctoribus, haud infimae auctori-
 tatis agnoscimus. Quibus praemissis, ad ipsam rerum
 cognitionem pergimus, coniugium definientes,
 B 2 quod

quod sit: *legitima viri & mulieris coniunctio, arctissimam vitae consuetudinem, iuriumque communicationem continens.*

§. III.

*An detur
coniugium
incantatiū?
quaeritur;
& affirma-
tur.*

Posse sagas & magos, diabolo cōoperante, coniuges infoecundos reddere, vel alias matrimonii usum inter illos impedire, id vero res, quae omnem fidem excedat, a multis dicitur, quod non admitto. Etenim si incantamenta dantur, quibus malefici thesauros deprehendere, milites nonnulli arma ligare, vel se aut alios ad certum tempus sensus expertes facere possunt, meritasque eo nomine poenas dant. vid. *in Corp. Iur. Militar. Regis Daniae Christiani VII. Krieger-Articul, art. 2. conf. Besold. Thesaur. Pract. Voce: Nessel-Berthnupffen*; cur non & ligatio quaedam magica coniugii exercitium finemque impediat? vid. *Besold. sub dict. Voce.* Cuiusmodi ligationem idcirco Ius Canonicum, in *c. 4. c. 33. Qu. 1.* diserte agnouit, sed & exempla diuersi generis perspicue & satis comprobant. *DelRio Lib. 3. Disquis. magic. Qu. 4. Sect. 8.* item *Cypraeus, Tr. de Iure Connub. cap. 9. §. 13. num. 13. & 40.* vbi inter alia, cum Tornaci anno 1585. Serenissimi Du-

Ducis Holsatiae Legatum egit, iuvenes duos, carris per urbem ibi vestos virgisque sacros, quod nudo maritos aliquos fascinaissent, se vidisse refert, poenamque simul istam tanto crimine, multo leviores fuisse, iudicat. Observamus vero, hoc malum facilius viros, quam foeminas infestare ac premere, forte: quia plures sunt maleficae, quam malefici, vel, quod aliis placet: quoniam, ubi plus operae & instrumentorum requiritur, ibi etiam facilius aliquis defectus & impedimentum occurrere potest. vid. *Delrio l. c.* Caeterum si quis alia exempla requireret, is *Besoldum in Thes. Pract. Voce: Nessel-Berthnupffen*, nec non *Dieth. in Contin. Eiusd. dict. Voce: adeat.*

§. IV.

Nec obstat: quod tamen mali huius naturalis ratio dari non possit, ac adeo non sit probabile, illud ^{Obiectio: mali illius non dari} existere, sed vanum potius. Vnde *Cocceius in not. posse ratio-*
ad Paul. Zach. Quaest. medico. legal. Tit. I. Quaest. 2. n. nem natu-
22. nihil certi de hac re se definire posse autumat. ralem. Res-
sponsio.
Etenim ob deficientem rationem res non statim ipsa non entibus adnumerari debet, cum alioquin & de oppido multis, quae vel citra omnem aut solidam

causam in physicis experientia sola manifestat, adhuc ambigendum foret. Superstitionis nihilominus notam illi tamen facile hic incurrunt, qui vel hunc vel alium magiae effectum characteribus, signis ac verbis magorum nudis, citra ullam aliam daemonis interuenientem operationem, attribuunt. Optime enim *Seneca 4. Natur. Quaest. 7. Rudis*, inquit, *antiquitas credebat, & attrahi imbres carminibus & cantibus, & repelli, quorum nihil fieri posse tam palam est, ut huius rei causa nullius Philosophi schola intranda sit.* Ex qua adeo vana quorundam, quantumvis celebrium virorum, quos *DelRio Lib. I. Disquis. magic. c. 4. Qu. 1. & 3.* memorat, mente, nec dubitandum, quin Imperatori, homines magicis suffuris §. 5. *I. de publ. indic.* occidi posse statuenti, nuncius hac vice remittendus sit, ni dicamus: Principem optimum, non pro principali ac efficiente nocumenti illati causa, sed tantum pro medio, sine quo vis magiae se exserere non potuerit, murmura suffurrosque praedictos agnouisse, nempe credidisse, non quod ipsi murmuri & verbis efficacia quaedam insit, sed quod Daemon, non nisi horrendo carmine pronuntiato, maleficos adiuuare velit.

vid.

vid. *Anthou. Matth. Tr. de Criminibus Tit. XI. c. 1. pag.*
226.

§. V.

Licet interim vero modi speciales, quibus, o- *Quot mo-*
 pera daemonis interueniente, malefici ac sagae con- *dis contin-*
 iuges ligant, infiniti esse possint, ita tamen in gene- *gere que-*
 re aut tales illi sunt, per quos ille mille fraudum *ant ligati-*
 artifex membri genitalis vsum, vel plane impedit, *ones inter*
 & coniugem impotentem facit, vel vfu quidem *coniuces,*
 membri nunc dicti haud impedito, mutuum tamen
 inter coniuges amorem prorsus aufert, eosdemque,
 licet, quando absentes sunt, ardentissime se ament,
 tempore nihilominus, quo conueniunt & coituri sunt,
 odio adeo graui accendit, vt vnus alterum vel vn-
 guibus dilaceratum, eque medio ac oculis suis pe-
 nitus sublatum velit. *vid. DelRio Lib. 3. Disqm. magic.*

Qu. 4. Sect. 8. & 9.

§. VI.

Per coniuges itaque nodatos hoc loco illi pro- *Quinam*
 prie a nobis intelliguntur, qui per magicum li- *b. l. noda-*
 gamen inepti tam ad generandum, quam ad con- *torum con-*
 cumbendum facti sunt. Vnde sic ab illis (a) impo- *iugum no-*
 tentes ac frigidi differunt, quoniam vsum Veneris *mine pro-*
 multis *prie veni-*
ant? Dis-

ferentia

inter illos

Impoten-

tes natura

vel facta

humano.

De signis

notis cogno-

scendi liga-

tos seu no-

datos con-

iuges. De

ligatione

Impo-

tentia ma-

gica respe-

ctiva.

multis horum ipsa iam natura ademit. Quamuis

caeterum nos haud lateat, maleficiatum nonnullis

cum dici, qui intuitu vnus, frigidum vero ac im-

potentem, qui omnium respectu coire nequit; Sed

falli tamen eos, vel exempla Syluani & Aurelii, quo-

rum vterque ob magiae nodum, prout ex Tacito &

Zonara *Delrio Lib. 3. Disquisit. Magic. Qu. 4. Sect. 8.*

refert, cum nulla congregi valuit. conf. *Paul. Zachias,*

Quaest. medico. leg. Lib. 9. Tit. 3. Qu. 2. n. 22. aliorumque

virorum & vxorum natura quidem sua potentum, sed

ratione huius solum vel illius foeminae aut viri im-

potentum, haud obscure comprobant. vid. *Paul. Za-*

chias, Lib. 3. Quaest. medico. legal. Tit. 1. Quaest. 6.

Brunn. in Iure Eccles. Lib. 2. c. 17. §. 7. Distinguendi (β)

a coniugibus, de quibus hic agimus, nodatis, erunt,

qui facta quidem, sed humano, velut per castratio-

nem, aut medicamenti alicuius venerosi oblatio-

nem, coeundi potentia orbatu sunt. Signa vero, ex

quibus vis coniugii per incantationem destructa co-

gnosci, & per quae ulterius a facultate, siue per na-

turam siue per hominis factum adempta, discerni

possit, apud *Paul. Zachiam in Quaestion. medico-le-*

galibus, Lib. 9. Tit. 3. Qu. 2. n. 26. & seqq. & Cyprum,

Tr.

Tr. de Iure Connub. loc. sup. alleg. sequentia occurrunt. Primum est, si Veneris sedes bene in quodam subiecto constituta fuerit, at commisceri tamen corpus prorsus ex parte sui nequeat. Secundum, si quis coire quidem cum aliis possit, sed non cum vxore, in qua interim nihil naturalem congressum impedit. Nam tum maleficiū a Daemone procreatum esse vel inde coniiciunt, quod ita spiritus ille impurus coniugi coniugem derelinquendi cumque aliis adulterandi occasionem offerat. Tertium, si quis e contrario redditus est impotens cum omnibus, præterquam cum vna, puta cum Amasia aut meretrice. Etenim hoc casu impotentia ideo a diabolo excitata erit, quia per eam homo necessario in fornicatione persistere debet, nec amasiam aut meretricem deferere potest. Habentur vero etiam *h. l.* pro ligatis, qui odio, in fine §. *anteced. s.* exposito, laborant.

§. VII.

Pedem ergo nunc ad separationem proferimus. *Generatim de separatione coniugum in tantarum.*
 Istaec vero, quoniam initio respectu coniugum a nobis quoad impotentiam descriptorum locum inueniat, vtpote propter quam matrimonium vel quoad ipsum vinculum pro nullo habetur, neminem, qui omnem
 C ma-

matrimonii finem in eorum nuptiis cessare aduerterit, ancipitem haesurum credimus. Itaque & inter coniuges nodatos atque incantatos non poterit non decerni separatio. Nam ponamus quoque, finem nunc dictum triplicem esse, nempe (1) sobolis procreationem, (2) mutuum adiutorium, & (3) libidinis extinctionem; Certe cum plane maleficiati congregi nequeant, eos tam ultimus quam primus finis, si vel maximus illorum fuerit nisus, facile destituet. Sed nec intermedio potiundi aliqua istos spes alet. Etenim si cum Augustino *Lib. 9. de Gener. ad Lif.* non fatendum, mutuum adiutorium, quoad actum demum gignendi in matrimonio spectari, sane extra concubitum tamen & commixtionem, consideratio eius vera esse non poterit, quoniam, ni officia coniugum, debitum imprimis coniugale, & copulam carnis respicerent, rectius eadem a duobus masculis, quam a personis diuersi sexus, obtineri ac expediri possent. Nec enim tam mulieris, quam viri alterius mens, in negotiis expediendis, viri genio ac moribus congruit. conf. *Gerhard. L. de Coniug. §. 233. pag. 353.* Cui placito haud repugnat: quod tamen in coniugio Iosephi cum beata virgine Maria mutuum

ali-

aliquod adiutorium absque concubitu statuendum sit; Enimuero quod hoc in specie matrimonium at-
tinet, multa in eo singularia se offerunt, adeo ut
collectio hinc ad nuptias aliorum merito nutet. Sic
enim & ipsa diuinæ prolis generatio in coniugali
hoc virgineoque simul foedere citra ullam cor-
porum commixtionem contigit; at quis tamen pro-
inde finem coniugii primum, nempe sobolis pro-
creationem & in hominum aliorum coniugio, sine
coitu esse vel fieri posse credat? Contrā quod incas-
sum porro vrseris: Imo, procreationem tamen, ex-
tra singulare illud connubium Iosephi cum Maria,
hoc modo comparatam esse, ut necessario concubi-
tum supponat, at hunc vero, per se & in genere ad
adiutorium, illudque mutuum etiam non requiri.
Nam prout ficulnea est consequentia: Obligatio per
se, verbis non indiget, E. nec in stipulatione, sic non
minus & sequens vacillat: mutuum adiutorium in
se ac generatiter acceptum carnalem copulam haud
respicit, Ergo nec in coniugio.

§. VIII.

Verum ut haec coniugii nullitas ac separatio, *Qualis*
quam asseruimus, admittenda sit, impotentiam, *impotentia*
ceu *requiratur,*
ex

ut separa-
tio incan-
tatorū con-
iugum ad-
mitti possit?
Debet illa
impotentia
esse plena.

ex dictis quodammodo iam constat, totalem, i. e. eiusmodi, quae omnem, tam concumbendi, quam generandi facultatem intercipiat, adesse oportet; Unde si maleficiatus forte sobolis quidem procreandae, attamen non coeundi potentia priuatus sit, nondum coniugium hinc dissoluendum erit, quoniam tunc ligato aliquem adhuc matrimonii finem obtinendi, copia datur. Sunt etiam, qui hic, vti cum coniuge natura impotente, sic non minus & cum tali, quem virtute coniugali, etiam quoad concubitum, vis magica exuit; si quidem pars vtraque maxime sana, impotentiae totalis ac perpetuae vitio non obstante, cohabitare nihilominus velit, coniugium per *c. 4. X. de frigid. & malefic.* concedunt. Ast quemadmodum matrimonium eiusmodi, quod cum inepto ad copulam, sponte atque data operam initum est, aliis non citra rationem displicet, vid. *Brunnem. in Iure Eccles. Lib. 2. c. 17. §. 2. Ziegler ad Lancell. Lib. 2. Tit. 16. §. 8. Cypraeus in Tr. de Iure Connub. c. 9. §. 13. n. 41. & 42.* dum utique pars potens de alio, in quem se recipiat, portu, non parum sollicita erit; ita id etiam vere tale, vel iuxta ipsum allegatum *capitulum*, non existit, quoniam, cum nulla causarum, ob quas nuptiae

ptiae a Deo quondam institutae, locum hic inueniat, impotens quoque per claram ipsius allegati capituli dispositionem non ut vxor vel maritus, sed ut soror solummodo ac frater habetur. conf. c. 5. X. Eod. & Ziegler ad Lancell. l. c. §. 7.

§. IX.

Debet II. impotentia per magiam procurata perinde, ut naturalis alioqui, ob quam nuptiae irritae fiunt, incurabilis & perpetua esse; Quare cum ista naturalis curandi modum omnem, regulariter respiciat. vid. Paul. Zachias Lib. 3. Quaest. medico-legal. Tit. I. Qu. 5. n. 56. non immerito (α) hic quaeritur: *Incurabilis & perpetua. An ad tollendam ligationem qua laborat coniux, magicam, ad magorum auxilium confugere licet?* Virum ad ligamen tollendum, ad maleficum, salua conscientia recurrere ac confugere concessum sit? Negatiuam quaestionis partem (1) adstruit Ius Diuinum, *Leuit. c. 19. v. 31. ibi: non declinetis ad magos, ceat? neque ab Ariolis aliquid sciscitemini, ut polluamini per eos.* & *Deuter. 18. v. 10. verb. nec inueniatur in te, qui lustrat filium suum aut filiam, ducens per ignem, aut qui Ariolos sciscitetur, & obseruet somnia atque auguria.* Cui adstipulatur (β) ratio, per quam maleficia peccatis cumulare citra dubium interdictum est. Quare & (γ) remediis ecclesiasticis, nempe precibus, hic

vtendum esse, communis opinio tenet. Affirmatiua ex aduerso in Iure Ciuili, per *l. 4. C. de malef. & mathem.* satis videtur fundata esse, siquidem iuxta nunc dictam legem incantatio, quae ob bonum finem, puta ob morbos curandos, vel tempestates repellendas suscipitur, extra omnem criminationem posita est. Sed cum interea non omnis statim actio, quae bonum sibi finem praefixum habet, bona idpropter audiat, ni & templum eo fine expilantes, quo pauperibus inde subueniatur, actum existemus bonum exercere, sane *allegatam l. 4.* quae Constantino Imperatori Christianorum primo ortum debet, religioni eius parum congruere, longeque hinc magis Christianismo Imperatoris Leonis sanctionem, quae est *in Nov. 65.* & magiam bono fine susceptam damnat, conformen esse, quis ambigat? Equidem sunt, qui naeuum hunc Imperatoris excusatum exinde volunt: quod tempore, quo praedictam legem quartam tulit, ille Christi dogmate nondum imbutus fuerit; Sed enimuero, cum illius conuersio Maxentio deuicto in annum 312. vel 313. post Christum natum incidat. vid. *Anth. Matth. Tr. de Criminibus, lit. de Siccar. c. 5. in fin. & Matthias in theatr. hist. pag.*

664. & 667. & vero *lex memorata* 4ta anno Christi 321. ceu ex inspectione & dato eius liquet, demum promulgata sit, suspicione illa excusatio non potest non laborare, tametsi interim non ignoremus, baptismo illum serius, nimirum anno 337. iuxta Eusebium aliosque, tinctum esse. *vid. Anton. Matth. l. c.* nonnullosque istam legem non de incantamentis, sed de solennibus processionibus & lustrationibus agrorum, quae olim per *Nov. 123. c. 32.* cum litariis publice decantatis fiebant, accipere. *vid. Brunnem. in Comment. ad C. Tit. de malef. & mathemat. d. l. 4.*

§. X.

Auxilium ergo magorum per se ac simpliciter hic rogare dubio procul vetitum est. Sed numne tamen certo minimum modo illos adire permisum erit? Istam vero circa quaestionem non una itidem omnibus mens sedet. Quidam enim non precibus, ast omnino tamen vi & verberibus opem a malefico extorqueri posse contendunt. Contra nonnulli remedium quaesitum vitio carere censent, ubi maleficus maleficio tollere paratus est. Tandem quibusdam licitum illud tunc visum, quando maleficio sine maleficio tolli potest, puta per destructi-

*An adire
minimum
magos li-
cet? non
indiscri-
minatim.*

onem signi, cuius intuitu pactum cum Daemone initum *Delr. lib. 6. Disquis. magic. Sect. 1. Quaest. 2. & 3. Brunnem. in Iur. Ecclesiast. lib. 2. c. 17. §. 4.* Prima in his opinio sequenti nititur ratione: quia, qui magum cogit, inhonorat diabolum, estque expers omnis peccati. Altera: quia concessum est, ab usurario v. c. pecuniam sub usuris mordacibus mutuo accipere, & idololatrae ad iurandum parato iusiurandum deferre, quamvis tamen, ut ille, prohibitum foenus accipiendo, ita & hic, iuramentum per falsos Deos praestando, graviter delinquat. Tertia: quia nudum signum destruendo, nullum, siue a mago, siue a parte illius, qui demolitionem istius signi a mago poscit, committitur peccatum. Nos igitur, ut ultimae sententiae placitum iam sequimur, sic secundo & primo loco expositam, eo ex capite, quod, utraque illarum non inuita, magiam fascinatus adhuc intendat, perque incantationem incantationi accedentem sibi consultum velit, merito reiicimus. Quae ratio opinionem ultimam (1) nec quicquam grauat, & (2) causas, quibus sententiae priores innituntur, iure destruit. Nam qui incantantem ad ferendam opem, operam magiae non exclu-

den.

dentem, vel minis grauibus ac verberibus adigit, is in factum illicitum hoc ipso vtique simul consentit, atque sic non tam diabolo, quam DEO honorem detrahit, foederisque porro cum pessimo spiritu iūti, dum maleficum ad id, quod is virtute pacti nunc memorati debet perficere, compellit, participem se facit. *Stryk. in Annot. ad Ius Eccles. Brunnem. Lib. 2. c. 17. §. 4.*

Deinde cum tam vsuris, quam iuramento per se nihil turpitudinis insit, & vero magiae delictum natura sua foedum existat, nec idololatra in specie, quoad conceptum mentis suae per alium, quam verum se DEum iurare putet, facilius omnino ex admissa incantatione, quam ex non debito rerum alioqui licitarum, puta vsurarum vel iuramenti vsu, redundare in consentientem labes potest.

§. XI.

Interim hucusque tradita manifestant, impotentiam ex incantatione ex eo, quod omnem medendi modum naturalem eludat. minime perpetuum simul esse, quoniam (1) diuina remedia saepenumero isthac potentiora sunt, quia (2) per sublatum a venefico vel saga signum maleficium non raro tollitur, imo quia, quod (3) addendum, vel nodus

An impotentia ex incantatione semper perpetua sit? Incantatio & ligatio temporaria quandoque

D

ipse

in perpetu- ipse magicus non nisi ad certum tempus, idque
am transit. vnius tantum noctis, interdum fiat, quod inter alia
Exemplum sententia, quae apud *Carpzonium in Decis. Saxon.*
nobilis cu- *Dec. 186.* inuenitur, satis comprobatur, verb. Wenn
iudam er eine andere freyhen würde, wolte sie ihm
Papiensis. gleichfalls einen Poffen thun, maßen aniso es
 auch geschehen, und sie das Schloß nicht ihm
 zum Schaden, sondern nur deswegen zugeschloß
 sen, damit er die erste Nacht nicht bey der Braut
 schlaffen könnte &c. quamuis tamen voto euentus non
 semper ac necessario respondeat, vt: cum is, qui so-
 lus aliquod incantamentum configere, ac vim eius
 solus quoque enervare nouerat, moriatur, cuiusmo-
 di casus *Menochius Lib. 2. de arbitr. Iud. Quaest. Cent.*
6. cas. 519. meminit, dum *num. ibid. 30.* nobilem
 quendam Papiensem proprio filio ac nurui male-
 ficia, concubitus in nimis adhuc tenera eorum ae-
 tate impediendi causa, ideo fecisse refert, quod eos
 perfectam aetatem adeptos ligatura iterum eximere
 vellet; esse vero patrem vita ante id tempus, ceu ad-
 dit, defunctum, vt adeo dissolui maleficium nun-
 quam potuerit.

§. XII.

Quare cum iuxta requisitum secundum, nodum magicum, ob quem matrimonium *h. l.* corruere debet, oporteat continuum esse, vid. supra §. IX. & vero ligatura, siue perpetua, siue temporaria, nemini hic, praeterquam eandem nectenti, perspecta esse possit, triennium inde explorandae perpetuitatis huius ergo, regulariter constitutum est, vid. *Menoch. cas. alleg. n. 13.* adeo, ut si vitium impotentiae praedictum intra tempus per ecclesiasticae medicinae munia, iuxta *c. fin. C. 33. Qu. 1.* sanatum non fuerit, coniuges, illo tanquam perpetuo & semper existente, seiungi possint, iureiurando adhaec credulitatis a septem propinquis vel vicinis bonae famae super copula carnis in coniugio deficiente praestito. vid. *c. 5. X. de frigid. & malef. conf. Nov. 22. c. 6.* vbi tamen id, quod de septima propinquorum vel vicinorum adhibenda manu in *cap. 5.* disponitur, Brunnemannus in *Iure Eccles. Lib. 2. r. 17. §. 3.* non amplius obseruari adnotavit. Caeterum triennium secundum adductus textus a die contracti matrimonii computatur, licet interea rectius id, si concubitus nuptias non statim insecutus, sed ob causas certas, puta ob mor-

*Ut ligatio
coniugis
magica
perpetua
habeatur,
quantum
temporis
spatium
requirant
iura? Quomodo
modo com-
putandum
id tempus
sit?*

bum &c. in incertum tempus dilatus fuerit, aut coniuges ante plenam pubertatem, velut anno 14. aut 12. coierint, tam priori casu a die copulae demum tentatae, quam posteriori post plenam non nisi pubertatem i. e. annum 18. putetur currere. vid. *Stryck. in not. ad Ius Eccles. Brunnem. Lib. 2. c. 17. §. 3. & Menoch. cas. cit. n. 14. & 15.*

§. XIII.

Nulla declarato ac dissoluto matrimonio propter incantamentum & ligationem magicam, an id redintegrandum, si postea sanitas redierit?

Quando itaque sic, spe rediturae sanitatis intra triennium haud affulgente, matrimonium pro nullo declaratum iam fuerit, an id, si omnem forte praeter opinionem vis maleficii postea cessit, redintegrandum erit? Neutiquam siue vnus coniugum nuptias cum alio nouas iam inierit, siue ambo adhuc separati sint, et ad vota secunda neuter eorum transierit. Et prior quidem casus, cuius veritas nemini forte suspecta est, in *all. c. ult. circa fin. C. 33. Qu. 1.* expresse decisus inuenitur. Alterum vero hae rationes extra controuersiam simul ponunt, quoniam (1) renouatio matrimonii, nisi verum aliquod coniugium antecesserit, non intelligitur. Atqui, vbi propter impotentiam id corruit, nullum idem vel statim ab initio fuit, quae nullitas porro, *arg. pr. I. de exhered. liber.*

liber. merito & post impedimentum adhuc sublatum durat. (2) Quia super coniugio tali sententia insuper accessit, ex qua adeo velut ex re iudicata separatis ius est quaesitum, quo priuari iidem contra suam voluntatem nequeunt. Non obstat vulgare Canonistarum dogma, iuxta quod alioqui in causa matrimoniali sententia contra coniugium lata in rem iudicatam nunquam transit. vid. *Andr. Vallens. Tit. de frigid. & malef. §. 6.* Nam haud dubie id primum in veris ac validis nuptiis procedit, vimque deinde potissimum tunc exferit, vbi falsa impedimenti alicuius adeoque & impotentiae allegatio sententiae pro dirimendo coniugio ferendae causam dedit. Etenim si fraude i. e. per impotentiam simulatam separatio impetrata fuerit, aut si ex errore etiam, quamvis probabili, iudex desideratae separationi annuerit, licet vel nouum ab vno separatorum coniugium iam initum fuerit, ad priores tamen eidem nuptias nihilominus est redeundum. vid. *c. 6. X. de frigid. & malef. nec non c. 7. X. de sentent. & re iudic.* Ais: imo, quia iudex impedimentum hic metuebat perpetuum, quod tamen temporarium tantum fuisse euentus postea docuit, sententia ex errore processit. Quare & porro vincu-

lum coniugii ruptum merito, re adhuc integra, coalescere debebit. vid. *Brunnem. in Iur. Eccles. Lib. 2. c. 17. §. 5.* Verum resp. non posse tamen (1) hunc errorem alicui partium imputari, quia neutra illi occasionem praebeuit. Nequit (2) coniugii vinculum dissolui, vel de nouo contrahi, vbi id, ceu per antecedentia constat, nunquam de iure validum & efficax fuit. Nam si illud hic supponas valuisse, nulla apparet ratio, quare non a parte illaesa, nouo quamuis coniugio alii iam copulata, matrimonium prius renouari debeat. Quo accedit, quod per §. *Disp. VI.* impotentia magica aliquando respectiua sit, ac adeo non statim, qui post separationem quoad alias potens factus, intuitu etiam eius, a qua est separatus, pro tali reputandus sit.

§. XIV.

Matrimonium propter incantationem & ligationem non soluitur, nisi ante copulam carnalem

Tandem III. vt per magicum nodum foedus connubiale dirimatur, oportet illum, quod & ad impotentiam naturalem alias, vbi ob illam matrimonium irritum fit, requiritur, nuptias plene consummatas antecessisse. Nam ineptitudo eas demum insecuta separationi amplius locum non facit. *c. 25. C. 32. Qu. 7. c. 29. C. 27. Qu. 2.* nisi forte vitium subsequens

sequens propria maleficiati culpa ac voluntate, quem ^{deprehenſa}
 tamen caſum inter rariffimos numeramus, contra-^{fuerit liga-}
 ctum fuerit. *arg. c. 7. C. 32. Qu. 2.* Etenim tum ille ^{lio. Gallia-}
 pro coniugis ſuae malitioſo deſertore merito eſt ^{rum cance-} *la.*
 habendus, perſonaeque alteri, quae dolo ac culpa
 omni vacat, matrimonium haud denegandum. *Stryk.*
in annot. ad Ius Eccleſ. Brunnem. Lib. 2. c. 17. §. 2. Ex-
 tra hunc caſum vero coniugibus absque dubio iam
 incumbit, quamcunque fortunam aequo animo fer-
 re. vid. *l. 22. §. 7. ff. ſolut. matrim. quemadm. dos per.*
conf. Carpz. in Iurispr. Eccleſ. Lib. 2. Def. 202. n. 9. At
 ita vero non absque ratione forte dixeris: Ergo vel
 ipſum hoc requiſitum tertium coniugio ob magiam
 dirimendo plane obſtat, ſiquidem impotentia, liga-
 turis magicis quaefita, matrimonio regulariter po-
 ſterior exiſtit, cum utique conſtet, eam in ipſo de
 ſponſationis actu ac die, quo coniugium ob conſen-
 ſum matrimoniale, iuxta *l. 30. ff. de R. N.* iam per-
 ſectum eſt, ut plurimum interuenire. De Gallia
 enim *Arnſaeus* refert. Ego in tota Gallia adeo fami-
 liariter obſeruavi nocti nodum, *LIER LE NOED* ipſi
 dicunt, ut plerumque ſponſi, miſſis nocturnis, antequam
 luceſcat, copulentur, ne ab incantatoribus per lucem
 con-

conspiciantur. Tr. de Iure Connub. c. 6. n. 19. p. m. 316.
 quam ligaturam magicam & in Vasconia frequentem
 esse *Corrasius* testis est. conf. *Delr. Lib. 3. Disquisit. ma-*
git. Qu. 4. Sect. 8. Sed vt nunc non dicamus, quod
 coniuges ipso copulationis die ligentur, haud vniuer-
 sale esse, sane licet ex abundanti etiam concedatur,
 ligaturam nunquam prius, sed semper in ipso de-
 sponsationis aut nuptiarum actu demum fieri, non
 tamen inde adhuc, eam coniugium esse insecutam,
 dextre probatum erit, cum omnino & tum istaec
 ante copulam carnalem, adeoque prius, quam ma-
 trimonium concubitu consummatum est, interue-
 nerit; quo sane tempore facta ad separationem con-
 iugum aequè adhuc sufficit, acsi ante matrimonium
 nondum perfectum contigisset. Nam non praecise
 intuitu perfecti, sed & ratione coniugii consummati
 maleficiū siue antecedens siue consequens aesti-
 mandum esse, *can. alleg. 29. c. 27. Qu. 2. satis aperit.*
ibi: ecce impossibilitas coeundi, SI POST. CARNALEM
COPVLAM inuenta fuerit in aliquo, non soluit coniu-
gium, si vero ANTE CARNALEM COPVLAM depre-
hensa fuerit, liberum facit mulieri, alium virum ac-
cipere.

Non est ergo: quare porro hic obuertas: Imo, *Obiectio.*
 ubi impotentia causa est matrimonii pro nullo habendi, intuitu ipsius statim in iurisdictione perfectio-
 nis id inualidum esse debuit, quia non concubitus;
 per *all. l. 30. de R. l.* sed consensus nuptias facit. Ete-
 nim licet quidem negandam non sit, matrimonium,
 ad quod consensus accessit, eatenus aliquando fir-
 mum fuisse, negatur tamen penitus, idem & in ef-
 ectu tale extitisse, utpote pro quali coniunctione
 valida ea indubitate demum habenda, quae aliquem
 coniugii finem plane, vel aliquo modo iam obti-
 nuit, aut illum consequi minimum non impedi-
 tur. Vnde quin hinc, aliquo ad concumbendum
 post nuptias consensu perfectas, at ante copulam ta-
 men coniugalem naturaliter inhabili facto, nuptiae
 similiter pro nullis adhuc declarari possint, per *c.*
ante alleg. 29. c. 27. l. 2. ambigi nequit.

§. XVI.

Tantum dispiciendum hic erit, quid iustum vl-
 terius sit, quando plane incertum est, num impo-
 tentia magica ante an vero post coniugium consum-
 matum acciderit? Debere autem coniuges tum non
 separari, sed sibi inuicem cohabitare, ac in coniugio
 permanere, nonnulli exinde statuunt, quod in du-
 bio non contra coniugium, sed potius pro illo iudi-
 candum sit. Verum cum in dubio benigniora sem-
 per praeferrenda sint, *l. 50. & l. 192. §. 1. ff. de R. i. &*
 vero lam.

vero parum fauoris coniugem potentem maneret, si absque omni culpa sua, alterius ad matrimonium inepti coniugis vinculo ac consortio perpetuo innoxius viveret; merito ac rectius contrarium aliis arridet, maxime, cum in dubio hoc casu, ubi de insanabili vitiō alias constat, & bonam proli, & fornicationis euitatio, & mutuum adiutorium deficiat, sicque eadem non minus causa, quae alioqui, ubi maleficium nuptias praecessisse certum est, se offert, pro dis-iunctione coniugum militet. *vid. Menoch. cas. supra alleg. 519. n. 32.*

§. XVII.

*Quid si ta-
men indu-
bitatum,
maleficium
contigisse
coniugio
carnali co-
pula con-
summato,
& statim
mox post
commix-
tionem?*

Sed annon vero ob haec incommoda malefi-
cium, de quo, quin coniugium carnali copula con-
summatum demum exceperit, non ambigitur, cum-
primis, si id commixtionem primo statim tempore
insecutum fuerit, & pars potens concubitusque cu-
pidine flagrans, ni disiungeretur, ad vltimum vsque
vitae spiritum vstionibus illicitis exposita foret, nu-
ptias similiter inualidas reddet? Placitum commune
talem ei vim denegat, quoniam (1) DEUS neminem,
cum, eo sic disponente, matrimonium ante initum
fuerit, supra vires suas tentaturus est. *vid. Carpz. in
Iurispr. Eccles. Lib. 2. Def. 202. in fin.* de quo eo minus
dubitandum, si coniux sanus ac mali experts opti-
mum illud extinguendae libidinis remedium, ac
tritum dictum: *Ora & labora*, iuxta sobriam, quae
quemque Christianum docet, vitam, actionum sua-
rum

rum regulam constituerit. (2) Quia metus vstionis ad mortem vsque coniugem potentem vexaturae est incertus, cum maleficiatus ante illum in fata non minus concedere, & si ligatura temporalis fuerit, viuens saepe illa adhuc eximi possit. Quamuis interea tamen secundum aliquos, sicubi carnis stimuli tam effrenes fuerint, vt nullis superari ac retundi mediis extra matrimonium licitis queant, Principi etiam integrum sit, coniugi potenti, incontinentia victo, dispensatione tandem sua succurrere, nouumque, priori seiuncto, thori socium eidem indulgere. *vid. Coccei. in not. ad Paul. Zach. Quaest. medico-legal. Lib. 9. Tit. 3. Qu. 2. n. 2.* Neque desunt, qui hoc casu polygamiam etiam, separatione non concessa, principem permittere posse adstruunt, quoniam illa (1) iure tantum humano interdicta sit, & (2) alicui, vel coniuge ad concubitum apta existente, inprimis si illa non refragetur, in remedium refrenandae libidinis insolitae concedi queat. *Hopp. in Comment. ad Instit. Tit. de Nupt. §. 6. & 7.* quam sententiam in medio relinquimus.

§. XVIII.

Sequitur iam separatio ex capite odii. Vt vt inte- *De separa-*
rim & quoad hoc ligamen precibus ab initio haud *tione con-*
dubie vtendum, ita tamen, si spes omnis redituri *iugum ex*
amoris deficiat, & odium praeterea immodicum *capite odii*
ac hoc modo comparatum sit, vt iuxta fin. §. 5. *Disp. per magis*
vnus alterum e medio sublatum velit, separari con- *constati.*

iuges non minus totaliter & quoad vinculum poterunt. Nec obstat, quod odium & saevitia dissolutionem coniugii talem non operetur, sed tantum separationem quoad thorum & mensam. Etenim hoc de odio naturaliter contingente accipi debet, ob quod separatio temporalis fit eo fine: ut animi coniugum reconcilientur, *Carpz. Iurisp. Ecoles. Lib. 2. tit. 12. def. 110. n. 12.* sed odium magicum regulariter est incurabile. *vid. Paul. Zachias Quaest. medico-legal. Lib. 3. tit. 1. qu. 5. n. 56.* cui accedit, quod & saevitia naturaliter talis, si fuerit cum periculo vitae coniuncta & incorrigibilis, ex veriori sententia matrimonium etiam quoad vinculum tollat. Nam si malitiosa desertio, in qua coniugis desertae vita per consequens solum & indirectum periclitatur, imo adulterium, per quod adulterans saepe intentionis eius non est, ut matrimonium totum dissolvere velit, sed ut libidini tantum suae indulgeat, vinculum coniugii nihilominus plane dirimit, cur non odium cum periculo vitae coniunctum, quod mortem directe infert, & cuius finis non alius est, quam ut per mortem coniugale vinculum necessario rumpatur, causa matrimonii totaliter & quoad vinculum dissoluendi existat? *vid. Stryk. in Vsf. Mod. 11. Tit. de Divort. & Repud. §. 27. & 36.*



COROLLARIA.

I.

Ex Iure Naturae.

1. Naturae coniugii congruit bonorum communio. Contra dotes legibus humanis pactisque acceptae ferendae.
2. Valida sunt Principum matrimonia per procuratores consummata.
3. Coniugium ad morganaticam verum matrimonium est.
4. Principibus licet sine hierologia consummare matrimonia.
5. Bynkershoekius, cum mare magnum siue Oceanum ad neminem pertinere adstruit, *quia retineri non possit*, ab iis, qui illum dominio exemptum aiunt, *quoniam nequeat occupari*, verbis tantum diffidet.

II.

Ex Iure Ciuili Romano.

1. Cum in prouincia quinque liberi a tutela liberent suscipienda; sed Germania inprimis trans-Rhenana Romanorum imperio paruerit nunquam: non videtur maiorum nostrorum nomini conciliari amplitudo, quod numerum liberorum quinarium a Romanis illo casu in excusatione tutelae constitutum adoptauimus.
2. Quod in §. 3. Inst. de Leg. Falcid. de pretiis seruorum manumissorum in ponenda quartae Falcidiae ratione deducendis cautum est, inepte ad pretia equorum accommodatur, qui ad cohonestandas personarum illustrium exsequias duci solent, was auf das Freuden- und Trauer-Pferd verwendet worden.

3. Actio, quae fideiussori aduersus creditorem ex leg. si contendat 28. ff. de fideiussor. datur, monstrum est in cerebro Practicorum natum.
4. Lex 6. ff. quae in fraud. cred. fact. vt rest. quatenus repudiare permittit hereditatem in creditorum fraudem, iniquissima & indigna est, quae in Christiana republica recipiatur.
5. Aequae vxori ob iniuriam marito illatam actio iniuriarum danda, ac marito propter iniuriam, quam passa est vxor. Idque contra legem 2. ff. de iniuriis & fam. libell. Ratio enim Icti Pauli: *aequum esse, ut uxores a viris, non viros ab vxoribus defendantur*; debilis admodum est atque ad mores Romanorum composita.

III.

Ex Iure Criminali.

1. Confinatio, *die Verstrickung*, quae est, cum in casu furti iterati secundi eiusque parui fur praestita vi pheda nummellis publicis expositus territorio, in quo deliquit, excedere prohibetur, poenarum fini magis respondet, quam quae loco illius decerni solet, relegatio.
2. Articulus Ordin. Crim. Carol. V. 109, haecenus ab usu recessit forensi, quatenus per magiam Imperator intelligi voluit crimen, quo multa fidei absone hominibus & diabolo attribuit vulgus, v. c. quod illi pacta ineant cum spiritu immundo, cumque eo concumbant, choreas instituant in monte Brueterorum, *auf dem Brocks Berge*, alios homines in lupos felesque transmutent ope entis maligni, variaque edant miracula, quae solus producere naturae conditor & conseruator potest.

3. Satira longe distat a libello famoso, &, qui vocatur, pasquillo. Illa neminem laedit, neque crimen est, sed licita vitiorum vituperatio sale adpersa. His inuehitur in alios iniuriis & scurrili lusu, praesertim si exprimat bouinator nomen eius, cuius famam sauciare animo destinauit.
4. Raptus crimen pro circumstantiis variam induit faciem.
5. Poena capitalis Leuit. XX. v. 10. in adulteros statuta non est legis diuinae yniuersalis, sed particularis forensis.

IV.

Ex Iure Canonico & Ecclesiastico.

1. Oeconomi seu administratores bonorum parochialium ante Concilium Chalcedonense & Hispalense non clerici solum sed & laici fuerunt. Postea haec cura solis commissa clericis, teste Gratiano in c. 22. C. 16. q. 7. vbi ratio adfertur plane rustica: *Indecorum est, laicum vicarium esse episcopi, & seculares in ecclesia iudicare. In uno enim eodemque officio non debet dispar esse professio, quod etiam in lege diuina prohibetur dicente Moyse: non arabis in boue simul & asino h. e. homines diuersae professionis in officio uno non sociabis.*
2. In Ecclesia Protestantium cura bonorum parochialium suprema spectat ad Principem, eorumque administratio etiam laicis conceditur, qui vocantur *Kirchen-Vorsteher, Kirchen-Väter, Kirchen-Geschworne*, seu, vt Hamburgi, *Kirchen-Iuraten*.
3. Iure Canonico duos testes cum parocho rustico testamento adfuisse sufficit, cum secundum cap. 10. X. de testam.

in ore duorum vel trium testium omne stet verum. Perinde ac si eo prohibuisset DEus adhiberi plures.

4. Iure Canonico ex habitu corporis non ex numero annorum aestimatur pubertas: ex quod est, quod femina ante annum duodecimum viripotens habeatur recteque matrimonium contrahat, *quoniam tum malitia supplet aetatem, c. pubertas 3. & c. de illis 9. X. de despons. impub.* Inelegans & acerba ratio.
5. Pontifex prohibet matrimonium etiam in quarto gradu lineae collateralis aequalis, *quoniam inueniantur quatuor humores in corpore humano, qui consistunt ex quatuor elementis, c. non debet 8. X. de consang. & affin.* Vecorditer.

V.

Ex Iure Publico Germanico.

1. Superioritatem territorialem Electoribus, Principibus & Statibus Germaniae tot pacificationibus, tot conuentionibus tot iurisiurandi sacramentis quaesitam & confirmatam absit dicere *foetum nouum atque in orbem protrusum.*
2. Aeuis Merouingorum, Carolingorum, Saxoniorum & sequentium Imperatorum usque ad interregnum magnum incognitus est Ordo Equestris Immediatus Franconicus, Sueuicus & Rhenanus.
3. Tantum abest, vt illis aeuis Ordines, quos laudauit, Equestres, fuerint Status.
4. Ciuitates Imperii Liberae sunt Status.
5. Ordo Equestris immediatus Franconicus, Sueuicus & Rhenanus non sunt Status.

S. D. G.

ORDINIS IVRIDICI
IN
ACADEMIA CHRISTIAN-ALBERTINA
b. t. DECANVS
IOANNES ZACHARIAS
HARTMANNVS, D.
INSTITVTIONVM IVSTINIANEARVM ET IVRIS
PATRII PROFESSOR ORDINARIVS,
DISPVTATIONEM INAUGVRALEM
VIRI CLARISSMI
IOANNIS HELVIGII ZIELINSKI,
ADVOCATI HAMBVRGENSIS,
DE
CONIVGIBVS INCANTA-
TIS EORVMQVE SEPA-
RATIONE

PRO GRADV DOCTORALI ET SVMMIS IN VTRO-
QVE IVRE HONORIBVS AC PRIVILEGIIS
CONSEQVENDIS

DIE DECEMBRIS ANNO M DCC XXVII
IN AUDITORIO MAIORI

CONSVETIS ANTE ET POST MERIDIEM HORIS
SOLENNITER HABENDAM

PRAEVIA DECENTI INVITATIONE INDICIT.

K I L I A E,
LITTERIS IOANNIS CHRISTOPHORI REVThERI,
ACAD. TYPOGR.

ORDINARY TRIBUNAL

COMMISSIONER OF THE
GENERAL LAND OFFICE
H.M. STATIONERY OFFICE

PRINTED BY THE
STATIONER GENERAL


FOR THE
STATIONER GENERAL

COMMISSIONER OF THE
GENERAL LAND OFFICE
H.M. STATIONERY OFFICE

PRINTED BY THE
STATIONER GENERAL

COMMISSIONER OF THE
GENERAL LAND OFFICE
H.M. STATIONERY OFFICE

PRINTED BY THE
STATIONER GENERAL



aleantne aliquid, quae circumferuntur, incantamenta & veneficia, quaestionis incertae est atque in vtramque partem agitatae. Alii ea superstitioni vanissimae adscribunt fabulasque dicunt, quibus nihil sit fabulosius. Contra alii illos ipsos vanos adpellant, qui vires & effectus incantationum magicarum stupendos tam praefra-
cte negauerunt, vel negare audent etiam nunc. Non est ergo, quod miremur, quare & matrimoniis haud raro aliquid fascini admixtum & adpersum omnis fere aetas crediderit. Et profecto, si sacra est memoria maiorum nostrorum, si vllum apud nos piaae antiquitatis pretium, matrimonia incantata veluti certa adfirmare sanctius & reuerentius est, quam nondum satis explorate cognita atque percepta perhibere. Nam etsi dissonae hodie audiantur voces, etsi vndique superstitio petatur, iuuare tamen fortasse potest deploratam causam exemplorum, quibus referti sunt annales, etiam illustrium, copia. Possem, si operae pretium foret, cumulum illorum struere. Verum sit nobis pro vniuerso populo vnus Imperator Fridericus V. qui cum Eleonoram in matrimonium duceret, incantationum potentiam ligationesque magicas vetularum quarundam Lusitanicarum teste locupletissimo Aenea Syluio mi-

rum in modum pertinuit. Non pigebit integram narrationem Aeneae, quae extat in vita Friderici, quia festiua & lepida est, hic recitari: Exinde, inquit, festinabat Imperator abire, Leonoram autem sponsam suam nondum cognouerat, quod id operis in Alemanniam referre volebat; siue ne sanguis Italicus sibi nasceretur, siue aliud religionis in mente gerens. Virgo moesta videbatur, quae se circumduci vult parum placentem existimabat. Quod cum Alfonsus animaduertisset, adiens Caesarem, in ea vrbe atque in his aedibus, ubi tunc fuere, contractum fuisse matrimonium indicit, ibique merito consummandum: a Deo datum esse, in eundem locum ut ambo venissent, orat ergo, ut virgini misceatur. Quod cum Fridericus negaret, ergo, innuit Alfonsus, neptem meam in Alemanniam duces, atque illinc cognitam, si minus placuerit, ad nos remittes, aut ea fortasse neglecta cum alia contrahes? quin potius eam hic cognosces, ut, si placeat, abducas rem gratam tecum, si minus, apud nos onus dimittas. Quibus verbis, etsi erat Caesar paullo debilior, commotus est, atque operam matrimonio dare statuit. Iussit igitur Teutonico more stratum adparari, iacentique sibi Leonoram in vlnas complexusque dari, ac praesente Rege cunctisque Proceribus adstantibus superduci culcitram. Neque aliud actum est, nisi datum osculum. Erant autem ambo vestiti, moxque inde surrexerunt. Sicque consuetudo Teutonicorum se habet, cum Principes primo iunguntur. Mulieres Hispanae, quae aderant, arbitratae rem serio geri, cum superduci culcitram viderunt, exclamantes indignum fieri facimus, Regem, qui talia permetteret, increpabant. Ille autem non sine risu & incunditate spectabat peregrinos mores. Nocte, quae instabat, futurus erat concubitus ex nudis.

Dum

Dum ergo saltationibus vniuersa curia intenta est, feminae Portugallenses, quibus cubiculi secretioris commissa cura erat, fumigationes super stratum faciunt, in quo iacendum est; carmina dicunt, & accersito sacerdote lectum benedicunt, irrorantque sanctis aquis: ut est superstitio mulierum, quae sic felix connubium & amorem utrinque perpetuum arbitrantur futurum. Quod ubi Caesar accepit, veretur, ne quid veneficii interueniret, alium sibi substerni lectum iussit, vocarique ad se coniugem. Timebat enim nutricem Imperatricis, quam rerum huiusmodi peritam aiunt, quibus fascinari mentes hominum solent, similemque illi putant, de qua nobis Poëta scribit:

Haec se carminibus promittit soluere mentes,
Quas velit; ast aliis duras immittere curas,
Sistere aquam fluuiis & vertere sidera retro,
Nocturnosque ciet manes, & mugire videbis
Sub pedibus terram & descendere montibus ornos.

Quibus rebus etsi plerique fidem habendam negent, Flaccus tamen cum diu pugnasset, his artibus nihil inesse ponderis, mutatus tandem, iam iam, inquit, efficaci do manus scientiae supplex. Et sunt qui Circem non fabulose vertisse in feras hominum vultus adfirment. Nos illud inprimis trahit, quod de Phitonissa sacri libri commemorant: quam Samuelis animam de inferni abditis euocasse tradunt ut virorum conspectibus redderetur. Si tamen animam Prophetæ fuisse credimus & non phantasticam potius illusionem Satanae. Vtuncque consultissimum censeo, cum facultas est, magicarum artium evitare fallacias, consiliumque Caesaris in ea re non vanum dico fuisse. Verum Imperatrix bis terque vocata in suo lecto manere, morem seruandum dicere: vi-

ros in stratum uxoris ire solitos, non contra fieri solere. Caesar veluti victus ad eam pergit rogatque, secum in alium thalamum profiscatur: recusantem manu prehendit, vincitque facile nolentem vincere, atque eo pacto vitatis incantationibus in alio lecto matrimonium consummatum est. Haec Aeneas Syluius, postea Papa Pius II. Scimus quoque, Pontificem Innocentium VIII. a. 1484. fascinationibus & ligationibus matrimoniorum peculiari Bulla occurrisse: Innocentius Episcopus, Seruus Seruorum Dei, ad futuram rei memoriam &c. Sane nuper ad nostrum non sine ingenti molestia peruenit auditum, quod in nonnullis partibus Alemanniae superioris, nec non in Moguntia. Colon. Treueron. Saltzburg. & Bremen. prouinciis, ciuitatibus, terris, locis & diocesis complures utriusque sexus personae, a fide catholica deuiantes, cum daemonibus, incubis & succubis abuti, ac suis incantationibus, carminibus & conjunctionibus aliisque nefandis superstitionibus & sortilegiis, excessibus, criminibus & delictis, mulierum partus, animalium foetus, terrae fruges, vinearum vuas, & arborum fructus, nec non homines, mulieres, pecora, pecudes & alia diuersorum generum animalia, vineas quoque, pomaria, prata, pascua, blada, frumenta, & alia terrae legumina perire, suffocari, & extinguere facere & procurare, ipsosque homines, mulieres, iumenta, pecora, pecudes & animalia diris tam intrinsecis quam extrinsecis doloribus & tormentis afficere & excruciare, AC EOSDEM HOMINES, NE GIGNERE, ET MULIERES, NE CONCIPERE, VIROS QVE VXORIBVS, ET MULIERES, NE VIRIS ACTVS CONIUGALES REDDERE VALEANT, IMPEDIRE &c. Nolim reliquam producere ante oculos antiquitatem, tot illustres animas, tot tantaque nomina, permagni

gni vires ligationum magicarum, sancto quoque matrimonio inimicarum, facientia. Tantum curiositas, quae non semper in vitio est, & cupiditas sciendi effectus ligationum illarum magicarum porentosos, modumque, quo perficiuntur, fortassis nos subit & angit? Et videtur, si quis alius, Cornelius Agrippa haec non mirabilia, sed prodigiis similia, edocere satis nos posse, ipse forte adflatus & adustus arcanorum istorum flammulis: *Restat, inquit lib. 1. de occult. philosoph. cap. 11. de ligationib. nunc videre rem magnae mirabilitatis, & ipsa est ligatio hominum in amorem vel odium, in aegritudines & sanitates, & eiusmodi. Item ligatio furum & latronum, ut in aliquo loco furari non possint: ligatio mercatorum, ut in aliquo loco emere vel vendere nequeant: ligatio exercitus, ut metam aliquam transire non possit: ligatio navium, ut nulla vi ventorum etiam infinitis velis per ventum tensis portum egredi minime valeant: item ligatio molendini, ut nullo impetu volui possit: ligatio agri, ut fruges in eo produci nequeant: ligatio loci alicuius, ut in eo coaedificari nihil possit: ligatio ignis, ut in aliquo loco accendi non possit, & quod aliquod combustibile adposito fortissimo igne non ardeat: item ligatio fulgurum & tempestatum, ut nocere non possint: ligatio avium & ferarum, ut volare vel fugere nequeant: & horum similia vix credibilia, quae tamen saepius experientia cognita sunt. Modi ligationum varii ab eodem Agrippa loco dicto peruulgati sunt: Fiunt autem, inquit, ligationes huiusmodi per veneficia, per collyria, unguenta, poriones, siue philtrea, per alligationes & suspensiones, per annulos, per fascinationes, per fortes imaginationes & animi excessus, per imagines & characteres, per incantationes,*

& imprecationes, per lumina, per sonos, per numeros, per verba & nomina, inuocationes, sacrificia, adiurationes, exorcismata, consecrationes, deuotiones, perque varias superstitiones & obseruationes, horumque similia. Sic legere meminisse ligari serpentem, vt nequeat loco cedere, quando hunc sibilum quis edat: *Ofii, Ofia, Ofii*. Sic verba: *Socnon Socnon*, eius esse aiunt efficaciae, vt fluxus sanguinis oppido sistatur, si efferantur vices septies, parsque laesa digito annulari tangatur. Idem esse perhibent, si haec mustitentur: *Charat, Cara, Sarite, confirma, consona, imaholite*. Sed & heliotropium collectum sole in Leone existente folioque lauri inuolutum cum dente lupi, itemque cynoglossum gestatum sub digito pedis maximo homines ira accensos & canes ligare adfirmant, vt illi nocere & maledicere, hi mordere & latrare nequeant. Non est, quare quis inhorrescat, quod ego haecce in chartam coniiciam. Neminem clam esse potest, plura & magis horrenda inueniri apud Albertum Magnum, Trallianum, Fernelium, Goclenium & sexcentos alios, qui omnem vitam in artibus his sublimibus atque altissimis egerunt. Postquam nobis aetas ingeniumque adoleuit, periculum non est, vt tam debile virus noxium nostris possit esse animabus. Deinde ita quidem ista ab illis referuntur: iisque fidem habeamus, quoad fas est. Sed in his videtur disceptationis caput esse, vt excutiat: an sine contactu mutationes in corporibus producere valeant mortales? an spiritus mali corpora, prout eorum libido est, mouere ac transmutare atque in imagines formare possint? quam rem Antonius van Dalen comm. de miraculis, item de idololatria & supersti-

fictione sub examen vocavit : porro an in verbis obscurissimis, in numeris, in characteribus, circulorum linearumque ductibus, in sono & aliis id genus observationibus ea consistat virtus, ut ligationum magicarum monstrosos effectus habere possimus persuasos ? Fateor in hoc scientiae genere nullas me noctes insomnes traduxisse, imo ne curiosi quidem aut diligentis hominis titulum adfectasse unquam. Quare ut ego equidem in causam hanc controuersam me demittam, animum nondum induxi neque inducturus facile sum. Illud indicare hic liceat, me cum permultis mente adsequi haud valere, qui possint mortales lege rerum omnium peruersa inconsultoque naturae auctore & conseruatore artibus suis magicis aut diaboli ope efficere, ut stent aquae, turres fluant, domicilia salitent, legiones spiritu diffentur, aegri deambulent, sepulti & vermibus consumti choreas ducant, senes studeant pilae, iuuenes algeant, eunuchi generent, gignant aniculae, contra ad parieñdum aptissimae sterilecant. O quam

Omnia transformant sese in miracula rerum!

Atque hi sunt illi, qui incantamenta quaeuis, & magiae potentiam, & ligationum vires, & portenta sagarum, & monstra diaboli iocum risumque faciunt. Quoniam rem ipsam persequi nunc non vacat, minimum referre nostra quis crederet, ut illos, qui magiae & veneficiorum incantationumque fidem omnem attenuatum iuerunt, breuiter percenserem. Sed nec id consilii hoc loco in pectore mihi esse potuit : quis enim omnes eruditorum, qui sagarum & magiae aniles fabulas perstrinxerunt, ordines vna vel duabus pagellis perambulabit?

))((

Nec

Nec tali auxilio, nec defensoribus istis

Tempus eget nostrum.

Interim praecipuae in ea causa partes fuerunt ex Iurisconsultis Illustris THOMASII de crimine magiae atque de orig. & progr. proc. inquis. contra sagas; ex Theologis magni SPENERI in den Theol. Bedendfen, & FRANCISCI HUTCHINSONII Theologiae Doctoris in Tractatu idiomate Anglico conscripto, cui titulus: *An historical essay concerning witchcraft.* Detrahere videar debitas huic Hutchinsonio laudes, si reticeam, quae de eo leguntur dans la Bibliothèque Angloise ou Histoire Litteraire de la Grande Bretagne l'an. 1718. tom. 3. partie 1. art. 3. p. 78. *Les erreurs les plus pernicieuses s'introduisent aisément parmi les hommes. Nous n'en rapporterons ici que deux exemples tres-capables de détromper ceux, qui ne sauroient concevoir, que certaines erreurs, quelque grossieres qu'elles soient, aient pu se glisser dans la religion Chrétienne. On a cru pendant plusieurs siècles, que les personnes, qu'on appelle heretiques, meritoient la mort, & on les a fait brûler d'une manière impitoyable. On a cru pendant plusieurs siècles, qu'il y avoit des sorciers, qui faisoient des pactes avec le Demon, & on les a condamnés à expirer au milieu des flammes. Mais aujourd'hui tous les Protestans sans exception & tous les Catholiques Romains éclairés desapprouvent le supplice des heretiques. Pour ce qui est du sortilege, on le regarde à présent comme une erreur vulgaire dans les pays mêmes, on l'on n'a point aboli les loix contre les sorciers. On ne fait plus mourir en Angleterre les personnes accusées de ce crime; & les Cours Souveraines de France ne connoissent plus de ces sortes de causes. Il est donc vrai, que l'on a oté la*

vie sans raison à une infinité d'heretiques & de prétendus sorciers. Après cela, doit-on être surpris que des erreurs moins prejudiciables à la société continuent de regner parmi les Chrétiens ? L'Auteur du Livre, dont nous allons rendre compte, s'est proposé de faire voir, qu'il n'y a point de véritables sorciers. Il a dédié son ouvrage à Milord Parker, Chef de Justice des Plaidoyers Communs, & à Mr. le Chevalier Bury, Principal Baron de l'Echiquier. On ne doit pas s'imaginer que ce livre soit inutile. Voici un fait assez récent, que je communiquerai à mes Lecteurs, & qui les convaincra, que Mr. Hutchinson n'a pas entrepris inutilement de combattre l'erreur vulgaire touchant les sorciers. L'an 1712. une vieille femme, nommée Jeanne Wenham, fut accusée d'être sorcière. On lui fit son procès à Hertford (qui est la Capitale de la Province du même nom) & les Jurez la trouverent coupable. Le Juge étonné de cette déclaration, leur dit : Quoi ? Messieurs, vous trouvez cette femme coupable d'avoir eu un commerce familier avec le Diable sous la forme d'un chat ? Oui, Milord, répondit le Chef des Jurez (en Anglois The Foreman of the Jury) c'est à dire, celui qui porte la parole au nom de tous les autres. Le Juge fut obligé de condamner cette femme à être pendue ; mais il obtint la grace de la Reine Anne. --- Ce livre est un dialogue entre un Ecclesiastique, un Avocat & un Juré. Sed ne excidat memoria prudentissimi Iesuitae Patris SPEE Cautio Criminalis, quo in libro acutum caput iam anno 1632. sortilegiis, quibus imperitae plebi illo aevo illudebatur, egregie rursus illuisse dicitur. Omnibus hisce doctissimi Angli IOANNIS WEBSTERI liber; *Displays of supposed witchcraft*; iungendus est. Qui acerrimi scriptor iudicii laudem Hutchinsonii non adaequasse

solum verum exsuperauisse etiam videtur. Fac vero dari incantata matrimonia & ligationibus magicis illa obnoxia esse: annon rursus medicamen dabitur ad soluendum fascinum? Consultam ea de re aliquando fuisse Facultatem Medicam N. ab amicis accepi, & respondisse eandem: **Sie wolten zwar glauben, daß wieder das Nestelknüpfen Kräuter gefunden würden, es wären ihnen aber dieselbe unbekandt.** Egregium & prudentissimum Responsum! cui si quis adquiescere dubitet, is mea quidem sententia nec iuuabitur anus apud Petronium opera, quae Polieno neruis ad Venerem destituto fuit salutaris, vt ipse ille de se testatum reliquit: *Illam de sinu licium protulit varii coloris, filis intortum, cervicemque vinxit meam. Mox turbatum sputo puluerem medio sustulit digito, frontemque repugnantis signauit. Hoc peracto carmine ter me iussit expuere.* - - -

Mensis agitur tertius, cum Vir Nobilissimus IOANNES HELVIGIVS ZIELINSKI mihi mitteret Dissertationem de coniugibus incantatis eorumque separatione, me Decano, si Amplissimo Ordini Iurisconsultorum ita visum fuerit, publice contra Dissidentes tuendam. Exposui, vt par est, illius desiderium in Facultatis confesso, Dissertationemque, in quantum immutaueram, nihil interposueram, aut interpolaueram, produxi. Probari quoque illam inclyto Ordini Iuridico intellexi. Hac itaque ita ferente occasione libuit non tam meam de incantationibus & ligationibus matrimonii sententiam dicere, quam effectus illarum negantium rationes leuissime indicare. Equidem videar saltem, magiam omnem & incantamentam nostro aeuo pene occisam habere. Verum quemadmodum

dum a nemine, dum spiritum traham, postulabo, ut ad mea
 sese praecepta velut ad leges alliget, ita eandem sentiendi li-
 bertatem mihi vicissim ab aliis largiendam esse iudico. Qua-
 re ex instituto maiorum laudabili restat, ut nobilissimi Can-
 didati IOANNIS HELVIGII ZIELINSKI ortum vitaeque &
 studiorum rationem cognoscamus. Ut exordiar inde, unde
 oportet, Hamburgum, decus Germaniae, natales illius sibi
 vindicat. Etsi quovis loco ingenia nascantur praeclara, non
 immerito tamen inter bona fortunae numeratur, in officina
 aliqua omnis politioris litteraturae in lucem edi. Genitus est
 die quarto Februarii anno septingentesimo supra millesimum
 Patre IOANNE IACOBO ZIELINSKI, Viro Praenobilissimo &
 Consultissimo, primum causarum forensium apud Hambur-
 genses usque ad annum sextum & decimum supra millesimum
 septingentesimum oratore disertissimo & celeberrimo, postea
 Regiae Maiestatis Daniae & Noruagiae Consiliario Cancellariae.
 Hic puerum non tantum publicis Lyceorum, quae Ham-
 burgi florent, praeceptoribus, verum domesticae quoque A-
 hasueri Burmesteri Notarii Caesarei Publici institutioni tradi-
 dit. Perceptis litterarum rudimentis studiorumque humani-
 tatis cognitione non leuiter tinctus noster coepit etiam iuue-
 nis admodum ex ductu optimi Parentis ad negotia forensia
 adplicare animum. Verum deinceps ex eodem genitoris
 prudentissimi consilio ad Academiam Regiomontanam, ut
 per grauiiores iuris disciplinas omnes mentem circumferret,
 ablegatus est. Auulsi a patria solum illius dulce & carum sae-
 pius cogitamus: Igitur cum ipsa Prussia orta sit gens Zielins-
 kiorum, ne miremur, quod Prussicam adire Academiam ius-

sus fuerit. Zielinskios enim claritudine & nobilitate generis
 praecellentes surrexisse in Polonia: & quosdam illorum rel-
 igionis causa in Prussiam concessisse, hosque, vt a Polonicis
 Zielinskiis sese distinguerent, litteram d' praeposuisse nomini,
 proditum memoriae est. Vid. Simon Okolski in Orbe Poloni-
 co. Hartknoch. in Chronico Prussico p. 356. & 451. aliiq.
 Ac nuper etiam litterae a Comite PACIO, quem Comitatus regni
 Poloniae anno MDCCII. dissoluta celebrauerunt, ad quen-
 dam vinculo propinquitatis Candidato nostro coniunctum
 exaratae nobilitatem antiquae huius gentis adhuc in Polonia
 peruigentem clare testantur. Ab re non facturum me esse
 arbitror, si luculentum istud testimonium huc transcribam:

CASIMIRVS MICHAEL Comes in
Dowspuda & Rozanka Pac, Eques Me-
litensis, Mareschalcus Curiae M. D.
Lit. Commendator Pornanien. & Stwo-
lowicen. Capitaneus Pincen. Szirwin-
tensis &c.

Notum testatumque praesenti attestatione mea facio v-
niuersis eandem lectionis, & caeteris, quibus soire conuenit: Quod
multum Illustris Familia Zielinski appellata semper floruerit no-
bilitate in Poloniae Regno, fueritque praerogatiuis celeberrimas
quando

quando & ad praesens adhuc tot tantaque specimina extant, quae
 egregia huius Familiae facta supremarumque dignitatum deco-
 ra, quibus erat semper & nunc est ornata, singulorum oculis di-
 lucide offerunt. In maiorem huius rei fidem propria manu me
 subscripsi, sigillumque meum adponi curavi. Datum in haere-
 ditariis bonis meis Domsprudensibus d. 30. Martii anno 1715.

CASIMIRVS MICHAEL Comes Pac,
Eques Melitensis, M. D. L. Curiae
Mareschalcus &c.

(L.S.)

Noster itaque, dum in celeberrima Regiomo^{nt}ana cam-
 moratus est, summis Antecessoribus, IOANNI STEINIO
 itemque BECKENSTEINIO, cui in Augustissimi Imperato-
 ris Russiae Academia, quae Petroburgi omnis generis sci-
 entias in maius meliusque prouehit, munus Professoris de-
 latum, operam dedit. Praesertim viro consultissimo BAL-
 THASARI TILESIO, Regiomontanae nunc Antecesso-
 ri iuris primario, se adiunxit, consiliaque & ductum eius se-
 cutus est, defenditque hoc ipso Praeside anno MDCCXXV.
 publicam Dissertationem: de Cautela bey Verpfändung mei-
 ner Haab und Gühter. Digressus anno M DCC XXVI.
 Pruthenicis Athenis Dantiscum aliasque splendoras mundi-
 tieque adfluentes vrbes spectauit. Tandem sub finem anni

M DCC

M DCC XXVI. in Holsatiam reuersus primum mente & meditatione crebra recolens, quae Regiomonti & alibi hauſerat, mox praxi forenſi animum adiacere coepit, ac deinde quo fructus industriae perciperet vberiores, a Facultate noſtra Iuridica, vt titulo Doctōis ornaretur, petiit. Quamobrem impetrata admiſſione ad examina, & reſpondendi alacritate & docta legum enodatione ita abunde Ordinis noſtri impleuit expectationem, vt iudicatus ſit digniſſimus, qui, quam obtulerat, Diſſertationem *de coniugibus incantatis eorumque ſeparatione* e publico ſuggeſtu futuro die Decembris tutaretur. Quod igitur muneris mei eſt, Proceres generis dignitatumque ſuarum ſplendore conſpicuos, & fautores Muſarum ſingulos, noſtrosque etiam, vt ſolemnnem hanc diſputationem audiant, quo par eſt, cultu & obſervantia togo. P. P. Kiliae d. Decembris M DCC XXVII.



42 t 77 m

